



Nefndasvið Alþingis
Atvinnuveganefnd
Austurstræti 8-10
150 Reykjavík

Alþingi
Erindi nr. P 140/1973
komudagur 26.4.2012

Efni: Ályktun Samtaka sveitarfélaga á Norðurlandi vestra (SSNV) um frumvarp til laga um stjórn fiskveiða (657. mál) og veiðigjald (658. Mál)

Hvammstanga 25. apríl 2012

Meirihluti stjórnar SSNV lýsir miklum áhyggjum af áhrifum framkominna frumvarpa um stjórn fiskveiða og veiðigjald. Minnt skal á að undanfarin ár hefur svæðið mátt búa við samdrátt á ýmsum sviðum. Það að boða stórfellda gjaldtöku á fyrirtækjum í sjávarútvegi er því bein aðfór að stöðu Norðurlands vestra. Meirihluti stjórnar minnir einnig á að sjávarbyggðir njóti réttlátar hlutdeildar í hverri þeirri gjaldtöku sem lögð verður á greinina.

Með fyrirleggjandi frumvörpum um stjórn fiskveiða er vegið að afkomuöryggi sjávarbyggða, þeirra sem starfa í greininni og fyrirtækja í sjávarútvegi, jafnt stórra en ekki síst smærri útgerða. Þá er horfið frá mikilvægum byggðatengingum. Nægir þar að nefna skerðingu á byggðakvóta, línuívilnun, rækju og skelbótum, boðað fyrirkomulag viðskipta með veiðiheimildir sem kemur hart niður á einyrkjum og smærri útgerðum, áhrif á þá sem treysta á fiskmarkaði og óljósa framsetningu leigupotta. Þá eru settar of miklar skorður gegn nýliðun í sjávarútvegi, en á meðal meginmarkmiða nýrrar löggjafar um stjórn fiskveiða ætti hinsvegar að vera að greiða fyrir nýliðun og þróun í atvinnugreininni og tryggja afkomugrundvöll sjávarbyggða.

Samkvæmt útreikningum endurskoðunarfyrirtækisins KPMG mun veiðigjald útgerða á Norðurlandi vestra nema 933 milljónum króna auk þess sem varanlegar aflaheimildir á svæðinu dragast saman saman um 567 þorskígildistonn (3,4%) frá því fyrir gildistöku laga nr. 70/2011 og 348 þorskígildistonn (2,1%) frá yfirstandandi fiskveiðiári.

Meirihluti stjórnarinnar skorar því á Alþingi að láta fara fram hlutlaust mat áhrifum frumvarpana, á atvinnuöryggi fólks, rekstaráhrifum á fyrirtæki, og sveitarfélög í byggðum landsins. Engum dylst nauðsyn þess að gera verður breytingar á núverandi fiskveiðistjórnarkerfi, til að ná betri sátt um einn af grunnatvinnuvegum þjóðarinnar, og tryggja verður þjóðareign á sjávarauðlindum. Sú „sátt“ getur ekki orðið eingöngu á kostnað sjávarbyggða og landsbyggðarinnar. Með vandaðri vinnu og samráði má ná árangri. Meirihluti stjórnar SSNV er reiðubúin að taka þátt í slíku starfi.

Bókun Sigurjóns Þórðarson varaformanns SSNV.

Tekið er undir það sjónarmið sem fram kemur í bókun meirihlutans að leggja til hliðar vanhugsuð frumvörp ríkisstjórnarinnar um stjórn fiskveiða og veiðigjald. Sömuleiðis er tekið heilshugar undir að frumvörpin séu sjávarbyggðunum stórhættuleg, þar sem dregið er markvisst með lögfestingu frumvarpanna, úr öllum byggðatengingum og enn frekar er aukið á



flutning á fjármagni úr dreifbýlinu með sérstakri skattlagningu.

Almennt eiga sveitarfélög að varast að spyrða hagsmuni sína við þrönga hagsmuni einstaka útgerðarmanna eða fyrirtækja en dæmin sanna vítt og breitt um landið m.a. á Norðurlandi vestra, hversu fallvalt og varhugavert það getur reynst. Miklu frekar eiga fulltrúar almennings að hvetja til réttlátra og skynsamra breytinga á stjórn fiskveiða. Núverandi kvótakerfi hefur reynst afar illa en þorskaflinn er um þriðjungur af því sem að stefnt var að, með upptöku kerfisins og sömuleiðis hefur kerfið sært réttlætiskennnd almennings. Það er því algerlega ábyrgðarlaust að ætla að festa kvótakerfið í sessi næstu áratugina nær óbreytt, ef frá er talin gríðarleg skattlagning.

Það blasir við að nauðsynlegt er að endurskoða frá grunni forsendur núverandi veiðistjórnunar og koma á auknu frelsi og jafnræði við nýtingu á sameiginlegri auðlind landsmanna. Augljóst er að það eitt að aðskilja fjárhagslega veiðar og fiskvinnslu mun tryggja sveitarfélögunum strax gríðarlegan tekjuauka.

Ofangreint tilkynnist hér með.

Virðingarfyllst

Jón Óskar Pétursson framkvæmdastjóri